



### **Uunga siunnersuut: Qarasaasiakkut akiliisitsisarnerup aqunneqarnera pillugu Inatsisartut inatsisaat nr. xx, xx. xxx 2017-imeersoq**

(Ilinniartitaanermut, Kultureqarnermut Ilisimatusarnermut Ilageeqarnermullu Naalakkersuisoq)

Naalakkersuisunut ilaasortap Naalakkersuisut sinnerlugit aalajangiiffigisassatut siunnersuutaanut qulaani pineqartumut qujalluta, matumuuna Inuit Ataqatigiinniit imatut oqaaseqaateqassaagut.

Naalakkersuisut taamatut inatsisissasut siunnersuuteqarnerminni, pisortani akiliisitsisarnerup aqunneqarnerata nutarteriffiginissaanut pisariillisarneqarnissaanullu tunngavissaqalernissaq, peqatigitillugulu innuttasut suliffeqarfiillu atugarisaannik allangortitsinnginnissaq pitsanngorsaasoqarnissaa, minnerunngitsumillu akiliutigineqartartunut tunngatillugu assaannarmik suleriaatsit ikinnerulernerisigut pisortani pisariinnerulersitsinissaq, taamaalillunilu allaffissornikkut annertuumik sipaaruteqarnerulersinnaanerup anguneqarsinnaanissaa siunnersuummi matumani tunngavilersuutigineqarpoq.

Illoqarfinni annerusuni, attaveqaatitigullu digitaliusumik attavigissaarfiusuni ullumikkut uunga killissimavugut allaat angerlarsimaffippulluunniit qimangikkaluarlugu akiligassavut suulluunniit akilersorsinnaanngorsimallugillu angerlarsimaffipput qimangikkaluarlugu sorpassuarnik nunatta iluani, nunattalu avataanut niuerniarsinnaanngornikuuvugut.

Toortagassannguit toortalaarutsigit qangaammalli akiligassavut akilereersimassavagut, toortagassannguit toortalaarutsigit qangaammalli kitaari pilerigisarput USA-miit maanga nunatsinnut tikisikatarissavarput.

Illoqarfinni annerusuni innuttaasut amerlanerpaartaat aningaasanik tigummiaraqanngikkaluarlutik niuerniaraangamik akiliut imaluunniit dankort atorlugu akiliisinnaanngornikuupput. Immaqa kukkuallaassanngilanga oqassaguma qangamut naleqqiullugu ullumikkut aningaasanik kaasarfimmioqartartut ikitsuaraannanngorsimagunartut.

Tassa attaveqarnerup tungaatigut pisariillisaanerup tamassa kingunerisai, qallunaatorlugu digitaliserinngimik taaneqarsinnaasoq; pisariillisaaneq allaqqunneqarsinnaanngitsoq ineriartortittuartaqartorlu, siunissaq eqqarsaatigalugu aningaasarpassuarnik sipaarutigineqarsinnaasoq.

Taamaattumik Inuit Ataqatigiinniit siunertaq anguniarneqartorlu paasilluarlugulu tapersorsorparput.

Taamaattoq naggataagut, illoqarfiit ilaanni attaveqaatitigut pitsaavallaanngitsumik atugassaqartinneqartut, soorlu avinngarusimasumiittut, minnerunngitsumillu utoqqartagut suli tamakku tungaasigut sungiussilluarsimanngitsut aqqissuussinissami uani nutaami puiorneqannginnissaat aammalu ajornerusumik atugassaqalinnginnissaasa aqqutissiuunneqarnissaat Inuiit Ataqtigiinniit pingaartillugu kissaatigeqaarput.

Taamatut Inuit Ataqtigiinniit oqaaseqarluta, Naalakkersuisut siunnersuutaat taperserlugu ataatsimiisitaliamut susassaqartumut ingerlateqqinneqarnissaa inassuteqaatigaarput.

Qujanaq

Peter Olsen